

Entalaw ay Hakhumpfay.

1 Anu cha Entalaw ay Hakhumpfay.

2 Nun-ahagwa anu cha Entalaw ay Hakhumpfay ja empfalay cha anu hi Pangngat.

3 Ja khun anu omer-ellog hi Pangngat ja khun i me'lewlegwa.

4 Hi ama na anu ja i nangajiw.

5 Ja hini i ta ken mangajiw ja umuy ta ken hichi pfuludna.

6 Gwa anu han hi Tu'-anug an khun omman hi takhu an jayan.

7 Allon cha ad ugwani an jayan.

8 Ja numpahijar anu hi Tu'-anug ja tinnig na hi Entalaw an omod Pangngat ja chimpap na anu.

9 Enala na ja in-uy na hichi pfalay cha ja inahinana ja initto na ay chin angang.

10 Amat hichi anu ja khun omer-ellog hi Pangngat ja i anu khun me'-ang-angngi' hichi ad Pfayyukan.

11 Ja chin anu angngi' na ja manurhulin ja mamhar anu, ja manorhortin.

12 Ipuhit na chin angngi' na ja nun-etapar na chin uchumna an angngi' chin ung-ungungnga.

13 <<Eeee! Manu hini angngi' mu ti manget-etapar muti inan Tu'-anug hi amam!>>

14 Immuy anu hi Pangngat ay ina na an hi Hakhumpfuy ja allona hi, <<Anagkha ni', inna ina Hakhumpfuy, ta un chah inan Tu'-anug hi ama?>>

15 Ja allona hi, <<Aa, mangka kaen an un atag i nangajiw ja chinittum na hi Tu'-anug ja inana.>>

16 Ja allona hi, <<Aa.>>

17 Ja gwa khu an mun-inggwi'gwiit ja immuy khu an i me'-ang'angngi'.

18 Ja amat hichi anu ja numpetlo hi i na ne'-a-angngi'an Pangngat chin unga.

19 Ja inali chay, <<Manu kayakhu hini angngi' mu ti manget-etapar muti penatoy Tu'-anug hi amam.>>

20 Immuy anu hi Pangngat ay ina na ja allonay, <<Ina, umuja' atag ta ija' tikhagwun hini namatoy ay ama ti tan un la-ahna ja un ta kayakhu i me'lewlegwa hon gwa an hapiton cha?>>

21 Allon ina na hi, <<Anong kay ja en-arkhaw cha an hapiton ja un ta khomegkhenong.>>

22 Ja allona hi, <<Achi an ija' tikhagwun hini namatoy ay ama.>>

23 Amat hichi ja empfaju na anu han tortollo an hongot na an toloh halug.

24 Ja enana chin inahinan ja initto na.

25 Ja enana chin pfangid na ja chin hu'-ud na.

26 Ja empacheh na.

27 Immuy anu hichi gwanggwang ja allona anu hi, <<Chah khu ton pfalay Tu'-anug?>>

28 Ja allon chin tatakhu hi, <<Chiyya makay.>>

29 Ja lenchong cha han ngilah an pfato an tukhi an ma-id chi mapfalin an umuy.

30 Ja allona hi, <<Kan aa, hotti umuja' ta ija' tikhan hi Tu'-anug.>>

31 Ja ma-id ken hi mapfalin hi agwun an hini gwanggwang chi agwun.

32 Amat hichi anu ja immuy ay chi gwanggwang ja allona hi, <<Anagkha ay chita angnge an ma-id agwun an tan un pohong an mangmangitit?>>

33 Ja unagkhu anu en a ja pfimmutay hichin otong an pfugwaja ja allona hi, <<Nga chah ni allom, Pangngat? Anah khun he-a?>>

34 Ja allon Pangngat hi, <<Achiya' anun ti tan un u i tikhan hi ama an inan Tu'-anug.>>

35 Allon chin pfugwaja hi, <<Ot un mu ayya i tikhan ja immali a ta munhakay a ay ha-in.>>
36 Ja inalin anu Pangngat hi, <<Ti aa, muti achiya' makay anun!>>
37 Ja inali na hi, <<Achi' he-a.>>
38 Nunhakay ay chi khatud chi pfugwaja ja khuna iha'-ihalug ja ingkhanah in-uy na hichi pamukhuu' na.
39 Ja inali na hi, <<Tayya! Tayya hitay an lahhip u ta umuy a hichi ha'jabna ja pfinakhaam khu hini ibpfa' an pfugwaja ta pfumutay khu ta ihalog chi-a ja emmat khu hichi ha'jaha'jabna ja ingkhana ay chi negpongan chi pfalay Tu'-anug.>>
40 Ja inali nay, <<Aa.>>
41 Ja immuy anu ay chi ha'jabna ja allona anu hi, <<Pfu'pfu'gwaja, pfutpfuttay a, ta hi'hi'-inga' hini ingam.>>
42 Ja pfimmutay chin cha'-ulay an pfugwaja ja inali na hi, <<Nga chah ni epfakham, ta anagkha ta pfakhaana' ay he-a?>>
43 Ja allona hi, <<Tan un u hingiton hi Tu'-anug ti una penatoy hi ama.>>
44 Ja allona hi, <<Aa, hot umali a ta mumpatto' a ay tay khatud u.>>
45 Ja numpatto' ay chuy khatud chin otong an pfugwaja ja khuna iha'-ihalug ja in-uy na hichi ha'jaha'jabna.
46 Enggwallang na ja allona hi, <<Tayya. Umuy a.>>
47 Ja immuy khu hichi ha'jabna ja immuy khu ja gwa khu chin oto'-otongan an pohong an ma-id agwun.
48 Ja allona hi, <<Nga khu ton agwun khu ay tay? Ja tayya ta'gwa chin inchat chin pfugwaja an lahhip ta pfakhaa' khu hay pfugwaja ay tay.>>
49 <<Pfu'pfu'gwaja, pfutpfuttay a, ta hi'hi'-inga' hini ingam.>>
50 Ja mun-ar-arpfopfot chin pfugwaja an pfumutay ja anchuchu-oy anu chin pfakhiw ay chin ta-o na ja napfagpfakhigwan anu chin khatud na.
51 Ja pfimmutay ja amat hi matan chi nagwan hichin mata na an nun-imortug.
52 Temma-ot hi Pangngat ti allona hi, <<Haw ikhad a pay! Ti anun chita!>>
53 Ja allon anu chin pfugwaja hi, <<Nga chah ni allom?>>
54 Ja allona hi, <<Tan una' umuy tikhan hi Tu'-anug ti una penatoy hi ama.>>
55 Ja allona hi, <<Aa. Hotti uma a ta mumpatto' a ay tay khatud u ta ijuy u he-a hichi ha'jabna.>>
56 Amat hichi anu ja numpatto' hi Pangngat ja khuna anu iju'-ijuy hichi ha'jabna.
57 Khuna ehlo-ehlong ja in-uy na hichi ha'jabna ja empatu'-ug na hi Pangngat. 58 Ja khun khu munhomunholong hi Pangngat ja immuy khu ay chi ha'jaha'jabna ja gwa khu han cho'cho-ollajan an pohong.
59 La-ahna ja nun-apfagpfakhigwan chin pipingngit na.
60 Amat hichi ja allona hi, <<Inay, ta pfakhaa' khu hay pfugwaja ta pfumutay ti chuja an nenehnot ay chi pfalay Tu'-anug.>>
61 Amat hichi anu ja allona hi, <<Pfu'pfu'gwaja, pfutpfuttay a, ta hi'hi'-inga' hini ingam.>>
62 Pfimmutay hichuy otong an pfugwaja khu.
63 La-ahna ja unagkhu mun-ar-arpfopfot ja amat hi lumugwog chin chanum hi arpfopfot na.
64 La-ahna ja impfipfichot anu Pangngat ay chin pingngit na ja allona hi, <<Haw ikhad a pay! Anah khun la-ahna ja pomhi' hichi arpfopfot chi pfugwaja?>>
65 Ja unot pfimmutay chin pfugwaja ja khun mungngangaloho hini pfapfa na ti napfagpfakhigwan hini pfapfa na.

66 Ja atotot hi muleng chin mata na an nun-imortug.
67 Amat hichi ja allon anu chin pfugwaja hi, <<Nga chah ni allom?>>
68 Ja allon Pangngat hi, <<Tan un penatoy Tu'-anug hi ama ja tan u gwa adni' i tikhagwun hi Tu'-anug.>>
69 Ja allona hi, <<Aa. Chiyya hichi ha'jabna hini pfalay Tu'-anug. Ma-a ta ehe'-eng mu ay tay inga' ta ijuy u he-a ay chuy.>>
70 Ja enhe'-eng na anu ja khun iju'-ijuy khu chin pfugwaja hichi hajukhu' na ja engwallang na ay chin pfato.
71 Ja immuy anu ken hi Pangngat ay chuy puun chin pfato ja allona hi, <<Ngachan ni aton an umuy hichi pfalay Tu'-anug ti tan un choplah?>>
72 Amat hichi anu ja enala na chin pfangid na ja khuna etalo'-eng.
73 Gwa an khun homahoma'jab an khun munkhinkhinnawwa ay chin choplah ja natopoh chin pfangid na.
74 Ja enhe-ot na ja enala na hichin hu'-ud na ja hijay khuna eta-etalo'-eng ay chin agwuna.
75 Ja emmatam hi pfalay Tu'-anug.
76 Ja allon anu Tu'-anug hi, <<Mmmm! Ngachah ni matakhutakhu?>>
77 Ja allona hi, <<Ha-in! Tan una' immali ta podho' an pon-empfalaja' ay he-a.>>
78 Amat hichi anu ja allon Tu'-anug hi, <<Aa. Maphod.>>
79 Allon anu Pangngat hi, <<Alam ja gwa chin khangham.>>
80 Ja allona hi, <<Gwacha kaykhu!>>
81 Ja i anu enalan Tu'-anug chin khangha na.
82 Ja titigkhan anu Pangngat hi Tu'-anug ja nahughukhijan an takhu ja chin pfapfa na anu ja amat hi pfapfan chi pi-at an akhakhalakha an nalatlatiyan hi chalan chi takhu.
83 Ja khun anu tomatta-ot hi Pangngat an allona hi, <<Haw ikhad a pay hitay an takhu an amat heto!>>
84 Amat hichi anu ja allona hi, <<Apajoom! Mangangha a ton lohong ja nanepfat a ton ho'long!>>
85 Ja khun anu mangangha chin lohong ja khun manepfat hichin ho'long ja khun cha anu ichi'chi'chi' an tomajaw ay Tu'-anug an allon Pangngat hi, <<Ingirngilig mu, Tu'-anug, ingirngilig mu, Tu'-anug!>>
86 Ja ingirngilig Tu'-anug ja intorchuna anu hi Tu'-anug ja khun makelokkelong an umuy hi ahpfuna hi Tu'-anug.
87 Ja allona hi, <<Natoy akkay hi Tu'-anug.>>
88 Gwa khu an en ja enggwangar na ay chuy pfalay ja gwa khu hi ahagwan Tu'-anug an khun numpepekheng ay chin patjay ja linapchu' na ja impagwingi na hichi ahpfuna.
89 Ja emmat khu an natoy khu ken hi ahagwan Tu'-anug ja natoy cha an chugwa.
90 Nuntalipon cha ja inalin Pangngat hi, <<Ai'! Uja' tikhagwun hi ama hay inahinana.>>
91 Ja immuy ja henongkhop ay chin pfalay Tu'-anug ja cho-or chin angang Tu'-anug.
92 Ente'te-a na ay chi aha an khuna ipa-ipapfutay hon pfu-un tungar ama na.
93 Hichi aha hon impapfutay na ja pfu-un ulun ama na.
94 Hichi aha an empapfutay na hon pfu-un tungar ama na.
95 Ja immuy anu ay chin me-apolo an angang ja unagkhu anu atag empapfutay ja chin ulun ama na!
96 Ja allona hi, <<Aa, tayya hi ama.>>

97 Enala na chin angang ja enkhahad na ja enala na chin tungar ama na ja heno'ho-op na.

98 Ja khuna pfokhebpfokhehan hi ama na ja nun-eho'-op hichin tungar.

99 Enala khu ja khuna khu pfokhebpfokhehan ja nephod chin lamana ja chin op-op na.

100 Ja allona hi, <<Aa, angkhaynana.>>

101 Ja amat hichi ja khuna pfokhebpfokhehan ja gwa anu an mun-eg-egwogwog.

102 Ja allona hi, <<Aa.>>

103 Ja enala na khu ja khuna khu pfokhebpfokhehan ja munhapit mahpay.

104 Ja allona hi, <<Aa.>>

105 Ja allon ama na hi, <<Anah khu un nujan he-a?>>

106 Ja allona hi, <<Aa an ha-in, an tan una' immali an maningit ay he-a ja un chi-a atag inan ay Tu'-anug ja tan in-ali chi-a heto.>>

107 Amat hichi ja allon Pangngat hi , <<Homalato' a hadchiya.>>

108 Ja simmalato' anu hi Entalaw ja ad-adchi.

109 Ja enala na anu khu ja pfingkhiana ja inalina khu hi, <<Sumalato' a adchiya.>>

110 Simmalato' anu khu ja ad-adchi.

111 Ja hinpingkhiana khu ja allona hi, <<Hot sumalato' a adchiya.>>

112 Simmalato' ja ammuna.

113 Amat hichi anu ja nun-eggwahan cha chin angang.

114 Ja nuntunud cha ja immuy cha ken hichi pfalay cha ja numparti cha.

115 Ja mun-an-anla cha ken.

116 Ja ma'ma'-enla khu hi Hakhumpfuy an hi ahagwana.

117 Ja allona hi, <<Maphochot ta immali a, Entalaw, ta ituloy ta an mun-ahagwa ja ingkha-ingkhana.>>

118 Ja angkhay.